
COMUNICÂT STAMPE

ASS.5 BASSE FURLANE E ARLEF INSIEMIT PAR PANDI IL PLURILINGUISIM AI GNÛFS GJENITÔRS

Udin, ai 12 di Dicembar 2012 - Cjoli par man i gjenitôrs tal moment plui biel de lôr vite, la nassite di un fi, par informâju dal valôr che une educazion plurilengâl al pues vê pe cressite di fruts cun ricjece culturâl e di pinsîr.

E je cheste la idee che e sta sot de intese firmade vuê te sede de Regjon a Udin jenfri la ARLeF - Agenzie regionâl pe lenghe furlane e la ASS 5 - Aziende pai servizis sanitariis "Basse Furlane", ae presince di personâl dal Servizi regionâl pes lenghis minoritariis.

Cun l'acuardi i doi ents si impegnin a meti in vore un progjet di informazion sul plurilinguisim e, in particolâr sul ûs dal furlan, indreçât a cui che al è daûr a diventâ pe prime volte gjenitôr e, daspò, tai moments de infanzie indulà che al è un contat cu la strutture sanitarie (par esempi lis vacinis).

"Al è un progjet strategjic che la ARLeF e à proponût pe prime volte ae ASS 5 par vie de particolâr sensibilitât mostrade dai siei dirigjents e operadôrs tai confronts dal ûs de lenghe furlane ma che o vin intenzion di slargjâ, une volte ben sperimentât, ancje aes altris Aziendis sanitariis che a lavorin in teritori indulà che si fevele il furlan", al à spiegât il president de ARLeF, Lorenzo Zanon.

"O volaressin che simpri plui fameis no si fasessin plui la domande, che purtrop si scolte ancjemò tantis voltis, ven a stâi se al è miôr fâ imparâ ai fruts l'inglês o il furlan : la strade juste e je chê di insegnâ dutis dôs lis lenghis e ancje plui di dôs!", al à rimarcât Zanon, ricuardant trop che al è impuartant vuê permeti ai zovins di vierzisi al mont ma ancje preservâ in lôr un fuart sens di identitât che al pues jessi madressût cun l'amôr pe lenghe di une tiere.

De sô bande la ASS 5 no je pardabon gnove a iniziativis di promozion linguistiche e sarâ duncje un bon teren par inressi tai operadôrs e tai utents la culture dal plurilinguisim.

"La nestre Aziende - al à spiegât il diretôr gjenerâl, Paolo Bordon - e à une identitât sociâl une vore precise, tant che buine part dal personâl medic, infermieristic e aministratîf al fevele furlan e o soi duncje sigûr che lis iniziativa che o larin a meti in vore dentri te suaze dal acuardi cu la ARLeF a saran puartadis indevant cun grande professionalitât e convinzion".

Plui di 250 operadôrs sanitaris e aministratîfs a àn partecipât a cors di furlan, a son stadis fatis campagnis di informazion cun volantins e materiâl bilengâl, a son stâts picjâts cartei tal distrets di San Zorç e distribuît un zûc par furlan pe prevenzion cuintri fum e masse bevi.

"Ma la vere novitât di chest protocol - al à spiegât Bordon - e je che cumò o varin mût di lavorâ a nivel culturâl: pandi chescj valôrs tal moment plui biel te vite di un om mi somee pardabon une idee vincent e ancje un servizi in plui pes nestris struturis di nassite".

Tal specific al è stât il diretôr de ARLeF William Cisilino a spiegâ lis iniziativa concretis che a vignaran metudis in vore cul protocol vie par dut il 2013.

"O fasarìn informazion e publicitât tes struturis di nassite, ma ancje par esempli al moment des vacinis periodichis, dant vie opuscui che a spieghin la impuartance dal plurilinguism e materiâl pai fruts bielzà produsût de ARLeF tant che la Pimpa par furlan, i cartons di 'Omenuts' e vie indevant. Di chê altre bande - al à concludût Cisilino - o fasarìn ancje formazion al personâl de Aziende che al varà di informâ e distribuî il materiâl".

dott. Elisabetta Pozzetto

Regione Autonoma Friuli Venezia Giulia
[ARLeF – Agenzie Regionâl pe Lenghe Furlane](#)
Piazza XX Settembre 23
33100 Udine

0039 0432 555724 fax 0432 204158
mob 0039 335 8002058